



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Parlamentu Nasionál
22 Abril 2020

JSMP husu ba deputadu sira atu evita diskusaun ne'ebé la nesesáriu no apropriadu iha debate OJE Retifikativu 2021

Parlamentu Nasionál iha 21 Abril 2021, liuhusi reuniaun plenária halo diskusaun no votasaun iha espesialidade ba Proposta Lei ne'ebé aprova alterasaun dahuluk ba Lei Nú. 14/2020 kona-ba Orsamentu Jerál Estatu 2021.

Durante observasaun JSMP iha diskusaun ba orsamentu retifikativu, nota katak deputadu sira hasai liafuan sira hanesan *“taka rádiu aat, lalikan ko'alia no diskute ona, mai vota de'it ona, frustadu, no asaltu podér, Ministru no Sekretáriu Estadu la iha funsaun no liafuan selu-seluktan”* ne'ebé la apropiadu no provokativu.

“JSMP preokupa ho deputadu sira ne'ebé hasai liafuan sira ne'ebé la apropiadu no provokativu no husu atu sira atu fokus de'it diskusaun ba iha orsamentu ne'e nia konteúdu atu bele fó solusaun di'ak ba rezolve problema povu no nasaun enfrenta hela relativamente situsaun kalamidade públiku hanesan dezastre naturál no pandemia Covid-19”, dehan Diretora Ezekutiva JSMP, Ana Paula Marçal.

JSMP dala barak ona kestiona prátika no atitude hirak ne'e liuhusi JSMP nia relatóriu anuál nune'e mós iha komunikadu imprensa sira, maibé deputadu sira kontinua ignora regra sira no prosedimentu sira ne'ebé aplika iha PN.

Tuir JSMP nia observasaun durante ne'e, deputadu barak mak hala'o sira-nia knaar iha reuniaun plenaria la halo tuir sira-nia dever sira ne'ebé konsagra iha provizaun Artigu 10 Rejimentu Parlamentu nian, liuliu provizaun pontu 2) Artigu 10 nian ne'e. Iha provizaun alinea a) pontu 2) prevee katak respeita dignidade Parlamentu Nasionál no deputadu sira nian, alinea b) pontu 2) prevee katak halo tuir orden no dixiplina sira iha Rejimentu no hatudu respeito ba autoridade Prezidente Parlamentu no iha alinea c) pontu 2) prevee katak kontribui liuhusi *“halalok”*

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telephone: 3323883 | 77040735
www.jsmp.tl
info@jsmp.tl

Facebook: www.facebook.com/timorleste.jsmp

deputadu sira-nian ba efikásia no prestíjiu serbisu sira Parlamentu nian. Nune'e, JSMP haree katak hahalok deputadu sira nian ne'e la tuir sira-nia devér ne'ebé Rejimentu haruka.

JSMP sujere ba Meza Parlamentu, partikularmente Prezidente Parlamentu atu bele uza nia kompeténsia tuir Rejimentu Parlamentu nian hodi jere ho di'ak diskusaun no hapara tiha intervensaun deputadu sira ne'ebé fora ka ses husi asuntu sira ne'ebé *guia* deputadu sira hodi diskute. Nune'e mós bele halo kedas xamada atensaun ba deputadu ne'ebé halo intervensaun la tuir Rejimentu ka viola ona Rejimentu Parlamentu nian, atu bele prevene deputadu sira hatudu hahalok hanesan iha plenária.

Proposta Lei Nú.34/V/3^a Alterasaun Dahuluk ba Lei Nú. 14/2020 kona-ba Orsamentu Jerál Estatu 2021 mai ho razaun atu reforsa prevensaun ba pandemia Covid-19. Montante orsamentu retifikativu ne'ebé Governu submete hamutuk miliaun US\$223,8.00 no husi montante ida ne'e, miliaun US\$89,00 sei halo ezersísio ba ajusta de'it OJE 2021 no husu aumentu tan mak miliaun US\$135,3.00.

Proposta ne'e aprovalu iha votasaun jeneralidade ho votu afavór 44, kontra 0 no absteinsaun 21 husi totál deputadu sira prezente na'in 65.

Atu hetan infomasaun kompletu bele kontaktu :

Ana Paula Marçal
Diretora Ezekutiva JSMP
Email: ana@jsmp.tl
website: <https://jsmp.tl/>